

Uunga siunnersuut: Inatsisartunut qinersisarneq pillugu Inatsisartut inatsisaat nr. xx, uu. qq. 2020-meersoq
(Naalakkersuisut Siulittaasuat)

Akissuteqaat
(Naalakkersuisut Siulittaasuat)

Aappassaaneerneqarnera

Naalakkersuisut isumaliutissiisummik Inatsisinut Allaffiup sulillaarsimanerannut qujaniarput.

Naalakkersuisut inatsisissatut siunnersuutip saqqummiunneqartup allanngortinnissaanut pingajussaaneerinnittoqarnissaanut ataatsimut siunnersuummik saqqummiinissartik naatsorsuutigaat, tassanilu isumaliutissiisummut ataatsimiititaliap erseqqissaatai ilanngunniarneqassapput.

Naalakkersuisut qarasaasiakkut taasisinnaanermut periarfissat ammaatsinnagit isumannaatsuuqarnissaa isertuussisoqarsinnaanissaalu iluamik aqunneqarsinnaassasut ataatsimiititaliamut isumaqataapput. Tassungalu atatillugu qinersisartutut qarasaasiakkut taasisinnaanerup piffissap ilaani ammaanqarsinnaanera inatsisissatut siunnersuummi periarfissaqalermat erseqqissarneqassaaq. Naalakkersuisut isumaqarput periarfissaq tamanna aatsaat pitsaaqutissat akornutissallu kiisalu ulorianaateqarsinnaasut assigiinngitsut ataatsimut naliliiffiqineqareerpata ammaanqassasooq, aamma pitsaaqutissat akornutissanit amerlanerusut isumannaatsumik paasineqareerpata.

Naalakkersuisut ukiup tulliani ullormi 6. april kommuninut qinersisoqalerpat atortut isumannaatsumik misilinneqarnissaat periarfissaasinnaanersoq misissorniarpaa. Massakkulli april 2021 tikitsinnagu misissuinerit pisariaqartinneqartut suliarineqareersimassanersut sulii qulaajaaffiqineqanngillat.

Nammineerluni taasinermi isertuussinissap qularnaarnissaa anguniarlugu tunngaviatigut akisussaanerup Naalakkersuisuniillunilu kommuniniinnera Naalakkersuisut isumaqatigaat. Allatut akisussaaneq qinersisartuni ataasiakkaaniittoq qinersisartup nammineq taasinermini isertuussassaanissaa inuup nammineq akisussaaffigisussaavaa.

Ullormi qinersivimmi taasisoqarnerani uppersaateqartoqartalermissaa pillugu piumasaqaammik atuisoqalernissaanik ataatsimiititaliaq Naalakkersuisunut kaammattuuteqarmat Naalakkersuisut maluginiarpaat. Inatsisissatut siunnersuummi saqqummiunneqartumi (§ 44, imm. 3) oqartussaasut uppersaammik saqqummiinissamik piumasaqarsinnaanerat periarfissaareerpoq. Qinersisartut tamakkerlutik uppersaammik takutitsisarnissaanut piumasaqartoqassappat innuttaasunut tamanut qinersisinnaasunut arlaatigut uppersaammik takutitsisarnissaq atorneqartariaqassaaq. Naalakkersuisut pingajussaaneerinnittoqarnissaanut qanoq iliorluni massakkut aalajangersagaq sakkortunerulersinnaanersoq erseqqinnerusumik misissorniarpaa.

Naalakkersuisut qinersisartut kommunimi qinersisartup najugaqarfigisaani qinersivimmut suugaluartumukarluni qinersisinnaanissaata periarfissinnissaa pillugu ataatsimiititaliaq Naalakkersuisunut kaammattuuteqarmat aamma maluginiarsimavaat. Tamannalu periarfissaalissappat qinersinermut allattuiffiit digitalinngortinneqartariaqarput, qinersinermut allattuiffiit qinersisarfinni tamani ulloq qinersivik naallugu qarasaasiakkut pissarsiarineqarsinnaasariaqarput. Siunnersuut tamanna Naalakkersuisut akuersaarsinnaavaat. Inatsisissatut siunnersuummi saqqummiunneqartumi (§ 23, imm. 3) qinersinermut allattuiffinnik digitaliusunik pilersitsisoqarsinnaanera periarfissinneqarpoq. Naalakkersuisut qinersinermut allattuiffinnik digitaliusunik pilersitsinissamut suliaq pingaartutut isigivaat. Naalakkersuisut pingajussaaneerinnittoqarnissaanut qanoq iliorluni massakkut aalajangersagaq (§ 44, imm. 3) naleqqussarneqarsinnaanersoq erseqqinnerusumik misissorniarpaat.

Inatsisissatut siunnersuummi saqqummiunneqartumi Qinersinermut Ataatsimiititaliami sisamanik ilaasortaqaarnissaanut siunnersuutigineqartoq ajorsinnaasutut ataatsimiititaliamit isigineqarmat Naalakkersuisut aamma maluginiarpaat. Naalakkersuisut ataatsimiititaliap ernumaneranut paasinnissinnaapput. Taamaattoqarmallu allannguutissatut siunnersuutit pingajussaaneerineqarnissaannut Qinersinermut Ataatsimiititaliami ilaasortat tallimanut amerlineqarnissaat pillugu siunnersuummik Naalakkersuisut saqqummiussaqaarniarput.

Taamatut oqaaseqarlunga inatsisissatut siunnersuut matumuuna Inatsisartuni oqaluuserisassanngortippara.